

Адамдарға қамқорлық сезіледі

Халық денсаулығының жай-күйі кез келген мемлекеттің өз азаматтарының алдындағы жауапкершілік дәрежесін айқындайтын әлеуметтік кепілдіктерінің көрсеткіші болып табылады.

Тәуелсіздіктің бастапқы жылдарында «алдымен экономика, сосын саясат» қағидасын ұстанған мемлекетіміз бүкіл адамзатқа сын болған коронавирус пандемиясы кезінде ел денсаулығын бірінші орынға шығарды. Мұндай әрекетке тек гуманизмді мұрат тұтқан мемлекеттер ғана барса керек.

Мемлекет басшысы Қасым-Жомарт Тоқаев елдегі коронавирус жағдайына байланысты енгізілген карантин шараларына қатысты мәлімдемесінде «Қазіргідей күрделі кезде әрбір азамат біздің назарымызда болады. Мемлекет ешкімді қиындыққа қалдырмайды» деп биліктің позициясын одаң әрі нақтылады. Карантин жарияланған кезеңнен бастап 4 миллион 250 мың азаматқа қаржылай көмек көрсетіліп, 570 мыңнан астам адамға азық-түлік таратылуы, коммуналдық төлемдерді, несиеңі төлеу бойынша арнайы шаралар қабылдануы Қазақстан Республикасы үшін әрбір адамның тағдыры, денсаулығы бірінші орында тұратындығын көрсетті.

Президенттің «Елімізді пандемияның шеңгелінен құтқару – бәрімізге ортақ міндет. Мен үшін әр азаматтың өмірінен қымбат ештеңе жоқ» деген сөзінен әрбір қазақстандыққа деген қамқорлық пен жауапкершіліктің мемлекетіміз үшін ешүақытта да күн тәртібінен түспейтіндігін сеземіз. Бұл біз үшін өте маңызды.

Президент «Елімізде азық-түлік тапшылығы жоқ екендігін» атап өтті. Қазіргі таңдағы азық-түліктің жеткілікті болуы, яғни нарықтың сапалы азық-түлікпен толықтырылуы, экономикалық қолжетімділік, яғни халықтың сатып алу мүмкіндігінің ескерілуі – азық-түлік мәселесін табысты шешудегі еліміздің жетістіктерінің бірі, елдің әлеуметтік-э-



кономикалық тұрақтылығын қамтамасыз етудің негізгі бағыты.

Сонымен қатар, Қасым-Жомарт Кемелұлы мемлекетіміздің халықаралық қоғамдастықтан ешнәрсені жасырмай, барлық мәліметті ашық жариялап отырғанын да атап өтті. Расында да, ресми билік тарапынан шынайы ақпараттар халыққа дер кезінде ұсынылуда. Дегенмен, карантин жағдайындағы халықтың эмоциялық жай-күйіне айла-шарғы жасап отырған түрлі бағыттағы топтар мен мүдделердің конгломераты да байқалып қалады. Оларды қазіргі таңда біріктіріп отырған мәселе – билікті сынау және саяси жаңғыру жолындағы реформаларды жоққа шығару. Сондықтан Президент бос сөз бен жалған ақпараттарға жол бермеуге шақырып отыр.

Еліміздің Тұңғыш Президенті Нұрсұлтан Назарбаев та осынау сын сағатта Мемлекет басшысына қолдау танытуға, Қазақстан қоғамын эволюциялық даму жолына түсуге шақырды. «Біздің кешегі тарихымыз бұлтартпас бір ақиқатқа – эволюциялық даму ғана ұлттың өркендеуіне мүмкіндік беретініне көзімізді жеткізді. Бұдан сабақ ала білмесек, тағы да тарихтың темір қақпанына түсеміз. Ендеше, эволюциялық даму қағидасы әрбір қазақстандықтың жеке басының дербес бағдарына айналуға тиіс» деді Елбасы.

Жер бетіне коронавирус індеті тараған бүгінгі сын сағатта Қазақстан халқының бірлігі шешуші рөл ойнайды деген сенімдеміз. Барлық тарихи сын

жағдайларда, Отанымызға төнген қауіп жағдайларында біз біріге білген елміз, халықты жарқын болашаққа бастайтын ерен азаматтарға қолдау танытып, солардың төңірегіне топтаса білген елміз. Қазіргі жағдай осындай ұйымшылдықты талап етеді. Сондықтан да Қазақстан халқының бірлігіне төнген қатерлерге қарсы тұру – мемлекеттік маңызы бар іс.

Президенттің мәлімдемесін қолдай отырып, М.Әуезов атындағы ОҚМУ ұжымы төтенше жағдай кезінде азаматтарға әлеуметтік қолдау көрсетті, медициналық бетперделер мен антисептиктерді университет жанындағы шеберханалар мен зертханаларда даярлап, мұқтаж жандарға таратты. Университетіміздің ерікті жастары төтенше жағдай басталған күннен қала аумағындағы індетті бәсеңдетуге арналған іс-шараларда белсенділік танытып жүр. Жатақханада қашықтан оқып жатқан шетелдік білім алушылар барлық қажеттіліктермен қамтамасыз етілді. Қазіргі таңда халыққа ең маңыздысы – дұрыс ақпарат жеткізу, көпшілікті жалған ақпараттардан, теріс пікірлерден сақтандыру. Бұл бағытта да университет ғалымдары БАҚ-тарда, әлеуметтік желілерде қашықтан оқытудың, онлайн, офлайн сабақтардың ерекшеліктері туралы, интернеттегі платформаларды қолданудың әдіснамалары туралы өз ой-пікірлерін жиі ортаға салуда.

Біз «Nur Otan» партиясының белсенді мүшелері ретінде азық-түлік дүкендерінде халыққа қолжетімді бағалардың сақталуы мен қала аумағындағы санитарлық тазалау жұмыстарының сапалы орындалуы, блок-бекеттердегі қаған карантиндік шаралардың тәртіпке сай болуын қадағалауға атсалысудамыз.

Кез келген қиындықты бірліктің арқасында ғана еңсеретініміз ақиқат. Ел Президентінің мәлімдемесін қолдай отырып, барша қазақстандықтарды карантин ережелерін қатаң сақтауға шақырамыз.

**Дария ҚОЖАМЖАРОВА,
М.Әуезов атындағы
ОҚМУ-дың ректоры**